

DÍZRA'DAU' NEDXU DA BZUAJ SAN PEDRO

*Dizra' gusel-la Pedro chee benne' ca' gucá'a Jesús,
ne zaj nase dínnaje'*

¹ Neda', Pedro, naca' benne' gubáz chee Jesucristo. Dxuzúaja' da nigá chee le'e nadxúajle lázrele, ne zrale xezre ca' zaj nababa Ponto, ne xezre ca' zaj nababa Galacia, ne xezre ca' zaj nababa Capadocia, ne xezre ca' zaj nababa Asia, ne xezre ca' zaj nababa Bitinia.

² Xradxu Dios ba guqué'e le'e ca da gunné' gate nate. Ne chee Be' Lá'azxa ba gucá'a Dios le'e chee guzúale dizra' chee', ne chee chádxele lu dxen chee Jesucristo. Dxenaba' lau Dios gúnnale'e le'e da chawe', ne xel-la' dxebeza zri lazre'.

Ca da dxebeza lázredxu

³ Dxue lá'anadxu Dios, Xra Xránadxu Jesucristo. Lawe' da dxexache lázrele'e dxi'u ba bene' cheedxu bexálajdxu lawe' da bebán Jesucristo ládujla benne' gate. Da nigá nuzaga na dxi'u chee cueza lázredxu,

⁴ ne gun na sile ca da nucueza Dios chee xabáa, da na' quebe cuia xi na, ne quebe xexúe na, ne quebe te chee na.

⁵ Lawe' da dxéajlele chee Dios, Le' guxre' le'e nen xel-la' waca chee' ca zrindxa zra na' sile du ca naca xel-la' weselá da nucueze' cheedxu, na' gulé'ene' na lu zra bzebe ni'.

6 Chee le na' dxebele'ele lácala dxun na ba xen tele xel-la' zi' tu chí'idau'.

7 Xel-la' dxeajlí lazre' chee le gaca chee na ca dxaca chee oro da dxedé na lu xi' chee xegá'ana chawe' na. Caní naca chee xel-la' dxeajlí lazre' chee le, gate ba gudé na lu xel-la' zi', na' xegá'ana na da zácadxa chee sile xel-la' szren, ne xel-la' ba lá'ana lu zra na' gate xelá' Jesucristo.

8 Le'e nazri'ile Jesucristo lácala quebe ne lé'ele Le', na' lawe' da nuxrén lázrele Le' lácala quebe ne xel'é'ele Le', dxebele'ele. Ca naca xel-la' dxebé chee le naca na da zrente da quebe séquentu' xuzájla'antu'

9 lawe' da nalá benne'du xu'u le lawe' da dxéajlele chee Dios.

10 Lu iza da ba guledé gate nate, benne' ca' gulenné' waláz chee Dios buluxúe xánnie', ne belexebéajni'e ca naca chee xel-la' weselá nigá, na' buluchálaje' ca naca xel-la' chawe' chee Dios da gunne' le'e.

11 Be' Lá'azxa, Bénnea' gusel-la Cristo, bzéajni'ine' benne' ca' buluchálaje' waláz chee Dios gate nate ca da saca Cristo, ne ca naca xel-la' szren da si'e te na', na' benne' ca' belexexílaje' nuzra benne' nigá, ne bátala gaca da dxenná Be' Lá'azxa, Bénnea' zúale le'.

12 Dios bzéajni'ine' benne' ca' ca naca chee da na' dxuluchálaje', gunné' quebe naca na chee lé'queze', san naca na cheedxu dxi'u. Na'a, da nigá naca dizra' chawe' da ba bénquezle, da buluchalaj benne' ca' ne chee Be' Lá'azxa, Bénnea' ze'e xabáa. Da caní gulaca lazre' gubáz chee xabáa xeléajni'ine'.

Dios dxenné' dxi'u chee gácadxu bi lá'azxa chee'

13 Chee le na', le guxúe xanne' ca da gunle. Tu dxál-lazqueze gunle da xrlátaje. Dute lázrdaule le guxrén lazre' xel-la' chawe' chee Dios, ne le cueza da gunne' le'e lu zra na' gate xelá' Jesucristo.

14 Lawe' da nácale bi chee Dios, le guzúa dizra' chee', ne québedxa gunle ca da guzá lázrele gate quebe ne gúnbeale Dios.

15 Na'a, le ta lu xel-la' lá'azxa chee' lawe' da naca Dios lá'azxa, Bénnea' gunné' le'e.

16 Cá'anqueze naxúajqueze na lu xiche lá'azxa chee', dxenné': "Le gaca lá'azxa, lawe' da naca' neda' lá'azxa."

17 Che dxennale le'e naca Dios Xrale, na' Le' dxuchi'e ca da dxelún bénneache, dxal-la' zrêbele Le' dxácate ne zúale lu xezr la xu nigá.

18 Dios ba bselé' le'e lu da benle gate na' guxíajlele ca da belún xra xrtaule, da calela, na' ba nézquezle quebe guca na ne chee tu da dxuzru na ca oro, ne plata.

19 Bselé' le'e ne chee dxen zácale'e chee Cristo, Bénnea' bzua cuine' lau Dios ca tu zrila'dau' du lazre', ne quebe nadxenba', be dxelutie' chee xunite lau Dios dul-la zaj nabague'.

20 Cristo ba nácaqueze chee' gate nate saque' da nigá, na' ble'e lu zra caní chee gaca chawe' chee.

21 Ne chee Cristo dxéajlele chee Dios, Bénnea' bsebané' Le' ládujla benne' gate, ne bca'ané' Le' szren. Chee le na' dxéajlele chee Dios, ne dxuxrén lázrele Le'.

22 Na'a, ba bzúale dizra' chee xel-la' li ne chee Be' Lá'azxa, chee zri'ile dute lázrdaule benne' zaj nababe' dxi'u. Chee le na' dxal-la' zri'ile ljwézrele

tule xetule dute lászdaule, ne dute xel-la' wala chee.

²³ Caní naca na lawe' da ba bexálajle, quegá chee bénneache, benne' dxelate. Nálajle ne chee dizra' chee Dios, da naca ban na, ne da zua na chadía chacanna.

²⁴ Caní naca na lawe' da naxúaj na lu xiche lá'azxa, da dxenná na:
Xúgute bénneache zaj naque' ca xixre',
na' xel-la' szren chee' naca na ca xiaj chee xixre'du
ca'.

Xixre' na' dxebizre na, na' xiaj chee na dxexruj na.

²⁵ Dizra' chee Xránadxu zúatequeze na chadía chacanna.

Dizra' nigá ba benle le'e ne chee dizra' chawe' da dxuchálajntu'.

2

¹ Chee le na', québedxa gunle da calela. Québedxa nu si xe, ne quebe gunle láweze da xrlátaje. Québedxa gácale xa lazre', ne quebe bi nnele chee ljwézrele.

² Cáteze dxeledane bidu dxe'ene ca' nizre', ca' le gane xrtizra Dios, da naca na du lazre', chee gun na se cháchale, ne lale lu na' dul-la.

³ Che da li ba guzú laule nézele naca Xránadxu chawe', na' gaca lászrele sídxale xrtizre'.

Cristo naque' ca xiaj xre ban

⁴ Le biga lau Xránadxu, Bénnea' naque' ca xiaj xre ban. Bénneache buluzúe' Le' chalá'ala, san lau Dios naque' tu xiaj chawe' da zácale' na.

⁵ Cá'anqueze le'e nácale ca xiaj ban ca'. Le güe Dios lataj guchínene' le'e chee guné' tu xudau' chee

Be' Lá'azxa chee', gácale bxruze chee Dios chee guzúale lau Dios ca da dxunna Be' Lá'azxa le'e. Da nigá waca gunle ne chee Jesucristo, da xezaca ba lazre' Dios.

⁶ Chee le na' lu xiche lá'azxa dxenná Dios:

Neda' nuzúa' lu xezre lá'azxa tu benne' naque' ca tu xiaj blau chee xu'u, da naca na tu xiaj du lazre',

ne da zácale'e na, na' nu benne' chéajle'e chee Le' quebe gaca xel-la' stu chee'.

⁷ Cheele le'e dxéajle chee', xiaj nigá zácale'e na, san chee benne' ca' quebe dxéajle'e naca na ca da dxenná xiche lá'azxa:

Xiaj na' buluzúa benne' wen xu'u ca' chalá'ala, le na' naca na xiaj blau.

⁸ Cá'anqueze naca na ca dxenná xiche lá'azxa:

Naque' tu xiaj da dxechegu bénneache, na' lawe' le na' dxeajlecházie'.

Caní naca na, dxeajlecházie' lawe' da quebe dx-elezi'e dizra' chee Dios. Dios ba núnqueze' gaca caní chee benne' ca'.

Benne' zaj naque' bi chee Dios

⁹ Le'e nácale benne' ba gucá'a Dios. Nácale bxuze lu zrin chee Benne' Wenná Bea, Jesús. Nácale tu xezre lá'azxa chee Dios, na' Le' naxá'awene' le'e chee guzenle bénneache ca naca xel-la' szren chee Dios. Le' gunné' le'e chee xedxúajle lu da chul-la, na' súale lu xel-la' naxaní' li lazre' chee'.

¹⁰ Gate nate quebe nu bexache lazre' le'e, san na'a Diósqueze' dxexache lazre' le'e.

Zúale chee gunle zrin chee Dios

¹¹ Bi bicha' nazri'ite lazra', dxata' xueda' le'e, nácale ca benne' zaj zre'e zitu' naga zua lazre', chee quebe gunle ca da dxenná beła' dxen chee, da dxedíl-lale na bénne'du xu'ule.

¹² Ca da dxunle, dxal-la' gaca na xrlátaje lau bénneache quebe zaj númbe'e Dios. Caní gaca na, lácala na'a dxeleonné' chee, dxeleonné' nácale benne' ca' dxeluné' da zrinnaj, na' welelé'equezne' da xrlátaje da dxunle, na' xelúe lá'anaqueze' Dios gate zrin zra xenaba Dios da ben tu tu bénneache.

¹³ Lawe' da nácale bi chee Xránadxu, le guzúa dizra' ca da dxenná benne' xu'u lawe', bénnea' buluzúa benne' xezre ca'. Le guzúa dizra' chee benne' nape' xel-la' dxenná bea zren,

¹⁴ ne chee benne' dxeleonné' bea, benne' ca' nasella le' chee xuludé' xel-la' zi' benne' ca' dxeluné' da zrinnaj, ne xelu'e ba lá'ana benne' ca' dxeluné' da xrlátaje.

¹⁵ Dios dxaca lazre' gunle le'e da xrlátaje chee guzúa zrile benne' ca' quebe zaj naxéajni'ine', gate dxeleonné' calela chee dizra' chawe' da nazile.

¹⁶ Le gaca ca benne' quebe zaj nada'u, san quebe guchínele da na' nazile, quebe gunle da calela. Le gaca ca benne' ca' dxenná be'e Dios.

¹⁷ Le gapa ba lá'ana xúgute bénneache. Le zri'i bi bíchedxu ca'. Le zrebe Dios, ne le gapa ba lá'ana benne' dxenná be'e.

Ca da guzaca zi' Cristo dxuzéajni'i na dxi'u

¹⁸ Le'e, bi wen zrin, le guzúa dizra' chee xránale dute xel-la' ba lá'ana, quegaze chee benne' zaj naque' zri'i lazre', ne dxelebé'e gunne xue chee, san cá'anqueze gunle chee benne' snia ca' zaj naque' xránale.

19 Naca na tu da xrlátaje che guchaga laudxu xel-la' zi' da dxulusaca bénneache dxi'u gate dxundxu da nezdXu naca na da dxezaca ba lazre' Dios.

20 Che dxunle tu da calela, na' dxulusaca zi'e le'e, ¿bizra da ba neza gaca na chee? Na'a, che dxedele xel-la' zi' lawe' da dxunle da xrlátaje, ne dxuchaga laule na dutē xel-la' zren lazre' chee, da nigá naca na xrlátaje lau Dios.

21 Dios gunné' le'e chee tele xel-la' zi' caní, lawe' da gudé Cristo xel-la' zi' waláz chee le'e, da dxuzéajni'i na le'e gunle ca da bēn Le'.

22 Le' quebe bene' dul-la, ne quebe nu guzí xe'e.

23 Gate bulucháchalēnē' Le', quebe bi dizra' schanni' bechebe'.

Gate buludéē' Le' xel-la' zi', Le' quebe bexéchaje'. Bzua cuine' lu na' Dios, Bénnea' dxuchi'e ca da naca na.

24 Biá'queze Cristo na' lu bela' dxen chee' ca naca dul-la cheedxu gate gude'e le'e xaga begúaj, chee gácadxu ca benne' gate, québedxa gundxu dul-la, na' gaca bandxu chee gundxu da xrlátaje.

Le' guzrié' we' chee xexácale le'e chawe'.

25 Le'e gudale gate nate ca zrila' zaj naníteba'.

Na'a ba bela'le lau Cristo, Bénnea' dxuxúe' le'e ca dxun tu benne' dxuxúe' zríla'du ca', ne dxe'e gunne xue chee bēnne'du xú'ule.

3

Ca dxal-la' xelún benne' zaj nuchaga na'

1 Cá'anqueze le'e, nu'ula nuchaga na'le, le guzúa dizra' chee benne' chee, na' che núlale zua benne' biu chee quebe dxéajle'e xrtizra Dios, xexúnbe'e naca na da li gate lé'ene' da xrlátaje da

dxun zru'ule', ne quebe gun na ba xen bi guchalaj zru'ule',

² lawe' da lé'ezenē' da xrlátaje dxune' lawe' da naque' xrlátaje, ne dxape' le' ba lá'ana.

³ Cá lechítaje chee tu nu'ula quebe dxal-la' gaca na cúzreze ca xel-la' dxupá'a xicha xíchajē', ne lechítaje da naca na oro, ne zra lanē' da zácale'e.

⁴ Lechítaje chee' dxal-la' gaca na lu xichaj lázrdawe', da naca na tu da xrtan da quebe te chee na. Da xrtan nigá naca na tu be' dxexruj lazre', ne zren lazre', da na' zácale'e na lau Dios.

⁵ Cá'anqueze guca lechítaje chee nu'ula ca' gu-laque' bi chee Dios gate nate. Nu'ula ca' buluxrén lazre' Dios, ne buluzúe' dizra' chee benne' chee'.

⁶ Cá'anqueze guca Sara, bzue' dizra' chee Abraham, na' guzre' le': "Xran." Le'e wácaquezle ca guca Sara na' che gunle da xrlátaje, ne quebe bi guchebe lázrele.

⁷ Cá'anqueze le'e, benne' biu, zúalele nu'ula, le gaca dxexruj lazre' nen zrú'ulale. Le gapa ba lá'ana zrú'ulale lawe' da quebe zaj naque' benne' wal-la ca le'e, ne cá'anqueze zaj nape' xel-la' nabán ca da nunna Dios le'e dutē xel-la' chawe' chee'. Dخال-la' gunle caní chee quebe bi guzaga na le'e gate guchálajlele Dios.

Benne' dxeledé' xel-la' zi' lawe' da dxelunē' da chawe'

⁸ Na'a:

Le gaca tuze

Le xexache lazre' ljwézrele, ne le zri'i ljwézrele.

Le gaca benne' zri'i lazre', ne zren lazre'.

⁹ Quebe gunle da calela chee benne' dxuné' cheele da calela, ne quebe gucháchalele benne' dxulucháchalene' le'e. Le gun da chawe' chee benne' ca' lawe' da gunné' Dios le'e chee sile da chawe'.

¹⁰ Caní naca na lawe' da dxenná xiche lá'azxa: Benne' dxaca lazre' gaca tu da ba neza chee', ne sue' xel-la' dxebé dxal-la' guxúe' luzre' chee quebe nne' dizra' schanni', ne guxúe' dxu'e chee quebe nne na da wen lazre'.

¹¹ Dخال-la' gusané' ca da calela bene', ne québedxa guné' na, chee guné' da chawe'. Dخال-la' cueche zrie' da ba xa', ne gaque' benne' zren lazre'.

¹² Xránadxu dxuxúe' benne' chawe' ca', ne dxenne' ca da dxelenaba benne' ca'. Dxuzúe' chalá'ala benne' wen da zrinnaj ca'.

¹³ ¿Núzraqueze benne' guné' cheele da zrinnaj che le'e cuele gunne xue gunle da chawe'?

¹⁴ Lácala tele xel-la' zi' lawe' da dxunle da chawe', gaca na da ba neza cheele. Quebe nu zrébele, ne quebe xrúsale.

¹⁵ Le gapa ba lá'ana Cristo ca Xránale lu xichaj lázrdaule. Le súateze ban lazre' xechébele lau benne' ca' dxelenabe' le'e bizr chee na' dxuxrén lázrele Le'. Le gun na lu xel-la' dxexruj lazre', ne le gapa ba lá'ana benne' ca'.

¹⁶ Le gun da chawe' chee quebe bi sua da gagu na zria lu xichaj lázrdaule, na' benne' ca' dxelenné' schanni' chee da chawe' da dxunle lawe' da dxéajle-le chee Cristo, xelapa stu'e ca dizra' da dxelenné'.

17 Zácadxa tele xel-la' zi' lawe' da dxunle da chawe' cáteze dxaca lazre Dios, ne quegá tele xel-la' zi' lawe' da dxunle da calela.

18 Caní naca na lawe' da gudé Cristo tu lásaze lu xel-la' gute zi xa' ne chee dul-la da nabágadxu. Le' guque' benne' xrlátaje, na' gudée' xel-la' zi' waláz cheedxu dxi'u, benne' wen da zrinnaj, chee gaca xeché'e dxi'u lau Dios. Gute Cristo lu bel-la' dxen chee', san bebánqueze' lu be' nácaqueze'.

19 Cá'anqueze lu be' nácaqueze' guxíaje' lataj chulla naga xeajchálajlene' be' zaj nácaqueze benne' ca' nuzaga xel-la' gute lu lataj na'.

20 Benne' caní quebe buluzúe' dizra' ca da bchajaj Noé gate nate, gate na' guleza Dios dute xel-la' zren lazre' chee' dxácatę na' ben Noé da zren na' da dxedá lawe' nísadau'. Lu da dxedá lawe' nísadau' gulelá xrúnuze benne' ne chee nisa xiuj da na' bzria xi na ca naca bėnneache.

21 Nisa xiuj na' dxulé'e na ca naca nisa naga dxelixedxúa benne' nisa, na' lu le na' naladxu na'a. Nisa nigá quegá le na' quibe na dxi'u, san dxulé'e na dxaca lázredxu chádxedxu lau Dios, na' ladxu lawe' da bebán Jesucristo ládujla benne' gate,

22 ne begüene' xabáa, ne zue' chalá'a xabela chee Dios, na' dizra' chee Le' dxuluzúa gubáz chee xabáa, gubáz ca' zaj nape' xel-la' dxenná bea, ne gubáz blau ca'.

4

Dxal-la' gundxu zrin chee Dios guchínedxu ca da ba nunna Dios dxi'u

1 Chee le na', ca ben Cristo, gudée' xel-la' zi' lu beła' dxen chee', cá'anqueze le'e dxal-la' si lu nale

tele xel-la' zi' lawe' da che tu benne' ba gudée' xel-la' zi' lu bela' dxen chee', ba bzua bēnea' chalá'ala da naca dul-la,

² chee' gunē' ca da dxaca lazre' Dios dxácatē naca banē', ne quebe gunē' ca da dxenná bela' dxen chee'.

³ Naze cáтите da ba benle gate nate da dxeledanne benne' quebe zaj núnbe'e Dios. Ca lu iza da ba guledé benle da sban ca', ne da zrinnaj ca' da guzá lázrele, ne guzúzrele, ne benle laní sban ca'. Güé'elē'ele, ne bca'ana szrenle bedau' xiaj xaga ca' da na' dxecuide Dios.

⁴ Benne' ca' quebe zaj núnbe'e Dios dxelexebánene' lawe' da québedxa dxunle le' tuze ca naca da sban da dxelunē', na' chee' le' na' dxelenné' schanni' chee'le.

⁵ Benne' ca', dxun na ba xen xululé'ene' ca da zaj nune' lau Bēnea' naca chee' guchi'e chee' benne' ban ca', ne chee' benne' gate ca'.

⁶ Benne' ca' zaj nate belenne' ca naca dizra' chee' Dios chee' xelexaca banē' lu be' zaj nácaqueze' ca naca ban Dios, lácala lu xēzr la xu nigá Dios bchi'e ca da belunē' ca guchi'e chee' xúgutē bēneache.

⁷ Ba za cheajsé chee' xúgutē da dxelé'edxu. Chee' le' na', le sua ban lazre', ne le guchálajlequeze Dios.

⁸ Da nácadxa blau, le zrí'ile'e ljuwézrele. Che nazrí'idxu benne' bíchedxu ca', na' gunite laudxu da calela da belunē' cheedxu.

⁹ Le guzúa lízrele ljuwézrele tule xetule, ne quebe nnele chee' ljuwézrele.

¹⁰ Tu tule le'e dxal-la' gunle zrin chee' ljuwézrele ca da nunna Dios chee'le, ca benne' dxuluchínene' chawe' ca da chawe' da dxunezruj Dios chee'.

11 Che nu benne' dxuchálaję', dxal-la' guchálaję' da gunezruj Dios le'. Che nu benne' gunę' zrin cheęle, dxal-la' gunę' na guchínene' xel-la' waca cheę' da nunezruj Dios le'. Ca naca xúgute da dxunle, dxal-la' gaca ba Dios lawe' da nácale bi cheę Jesucristo, na' cheę Le' gaca xel-la' szren, ne xel-la' dxenná bea chadía chacanna. ¡Ca'an gaca na!

Wadedxu xel-la' zi' lawe' da nácadxu bi cheę Cristo

12 Benne' bícha'dau' nazri'ite lazra', quebe xebánele ca naca xel-la' zi' zren da tele, quebe guéquele naca na tu da quebe dxal-la' gaca.

13 Le be lawe' da tele xel-la' zi' ca xel-la' zi' da gudé Cristo cheę cá'anqueze béle'ęle gate lé'ele xel-la' szren cheę Cristo gate zezé'e.

14 Che dxulugazja' benne' le'e dizra' lawe' da nácale bi cheę Cristo, ba neza zren naca na cheęle, lawe' da zúalę Be' Lá'azxa cheę Dios le'e, Bénnea' ze'ę xabáa. Dxelenné bénneache schanni' cheę Le', san le'e dxápale Le' ba lá'ana.

15 Che núlale le'e dxedele xel-la' zi', quebe dxal-la' gaca na lawe' da bétele benne', u bi gulanle cheę benne', u bi da zrinnaj benle, u lawe' da guchixre cheęle da naca cheę benne' xula.

16 Che nu benne' dxedęę' xel-la' zi' lawe' da naque' bi cheę Cristo, quebe dxal-la' xedué'eng', san dxal-la' güelá'anę' Dios lawe' da nazíle' bi cheę Cristo.

17 Ba bzrin zra su lau Dios guchi'ę ca da zaj nun tu tu bi nácabę' cheę Le'. Che Dios su lawe' guchi'ę ca da nundxu dxi'ü, ¿ájala gaca cheę benne'

ca' quebe dxeluné' ca dxenná dizra' chawe' chee Dios?

¹⁸ Che benne' xrlátaje ca' cánnaze xeledé' ¿ájazraqueze gaca chee benne' wen da zrinnaj ca', ne chee benne' wen dul-la ca'?

¹⁹ Caní naca, benne' dxeledé' xel-la' zi' lawe' da dxeluné' da xrlátaje da dxaca lazre' Dios, dxalla' xelúnqueze' da xrlátaje, ne xuluzúe' benne'du zaj xu'e lu na' Dios, Bénnea' bene' le', lawe' da naca Le' li lazre'.

5

Pedro dxuzéajni'ine' bi ca' chee Cristo

¹ Dxuzéajni'ida' le'e, benne' gula dxuxúele tu tu cue' bi ca' chee Cristo lawe' da naca' neda' benne' gula ca le'e, ne dxexecheba' ca xel-la' zi' da gudé Cristo, ne cá'anqueze lawe' da gúnnaqueze' neda', ne le'e, chee sidxu da xabáa chee' da gulé'ene' te chee zra caní.

² Ca dxelún benne' dxuluxúe' zrila' ca', le guxúe bidu ca' chee Dios, benne'du ca' nabágale. Le gun na dute lárdaule ca dxaca lazre' Dios, quebe gun na ba xen nu benne' nna bé'ene' le'e, ne quebe gunle ba chee dumí. Le gun zrin du lázrele,

³ ne quebe gun cuínale ca xrane benne'du ca' nabágale. Le gun ba xuzre gácale tu da gulé'e na ca dxal-la' xelún benne'du ca'.

⁴ Caní gaca, gate xelá' Xránadxu, Benne' Blau dxuxúe' zrila' ca', sile tu lazruj da naca na chee xabáa, da quebe te chee na.

⁵ Cá'anqueze le'e, benne' cuide', le gun ca da dxelenná benne' gula ca'. Xúgutele dxal-la' guzúale

dizra' chee ljuwézrele tule xetule lu xel-la' dxexruj lazre' chee lawe' da dxenná xiche lá'azxa:
 Dios dxezré'e benne' ca' dxulucá'ana szren cuine'.
 Dute xel-la' chawe' chee' dxácalene' benne' dx-
 exruj lazre' ca'.

⁶ Le guzexruj lázrele lu xel-la' dxenná bea zren chee Dios, na' xechisa Le' le'e ca zrin zra chee na.

⁷ Le guzúa lu na' Dios xúgute da dxele gunne xue, lawe' da dxe' Le' gunne xue da naca cheele.

⁸ Le gaca benne' li lazre', ne le sua ban lazre' lawe' da dxedá da xriwe', da na' dxezrá'a na le'e, ne naca na ca tu bezre xixre', dxebezre xa'aba', dxíljaba' nu guébeba'.

⁹ Le tíl-lale da xriwe', ne le se chacha lu xel-la' dx-eajlí lazre' cheele, lawe' da nézquezle dxeledéqueze xúgute bíchele zaj zré'e lu xezr la xu nigá xel-la' zi' ca da dxedele le'e.

¹⁰ Gate bache gudele xel-la' zi' tu chi'i, Dios guné' le'e li lazre', ne guzúa chawe'e le'e. Dios ná'queze dxunne' dxi'u xúgute da chawe' chee', ne ba gunné' dxi'u chee gápadxu da naca chee xabáa chee' lawe' da nácadxu bi chee Jesucristo.

¹¹ Gaca ba Le', ne chee' Le' gaca xel-la' dxenná bea chadía chacanna. ¡Ca'an gaca na!

Pedro dxugape' diuzre bi bíchedxu ca'

¹² Silvano, benne' nigá dxéqueda' naque' tu bi bíchedxu li lazre', ba bzuaje' dizra' caní cheele le'e cáteze neda', Pedro, ba gucha' le' guzúaje'. Dx-uzéajni'ida' le'e, ne dxapa' le'e ca naca da xrlátaje da ba guzile da dxululé'e na Dios nazri'ine' le'e. Le se chacha ca zaj naca da caní.

¹³ Bi chee Cristo zaj zré'e Babilonia nigá, benne' ca' gucá'a Dios ca guqué'e le'e, dxulugape' le'e

diuzre. Cá'anqueze Marcos, bi na' nácabe' ca bi cheéqueza' dxugápabe' le'e diuzre.

¹⁴ Le gugapa diuzre ljuézrele tule xetule, ne le gunida' ljuézrele lu xel-la' zri'i lazre'.

Dxenaba' lau Dios gunne' le'e xel-la' dxebeza zri lazre', le'e nácale bi ca' chee Jesucristo. ¡Ca'an gacana!

**Xela wezria cube nen salmo ca’
New Testament and Psalms in Zapotec, Tabaa
(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

Copyright Information

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament and Psalms

in Zapotec, Tabaa

© 1981, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

80626b72-93df-58ae-9f5e-9d86733fab46